

AURKEZPEN EKITALDIA. «Aldaketa politikoa bideratzeko» konpromisoak biltzeko garaia dela adierazi dute

Autodeterminaziorako Bilgunea sortu dute Iruñean, «tresna politiko berria»

Hirurehun «abertzalek eta ezkertiarrek» sostengua eman zioten atzo Iruñean sinatutako dokumentuari

Kristina Berasain | IRUÑEA

«Euskal Herriaren etorkizuna lantzeko tresna politiko berri bat» aurkeztu zen atzo Iruñean: Autodeterminaziorako Bilgunea (AuB). 300 «abertzale eta ezkertiar» bildu ziren ekimen berriari babesa emateko. «Gure lurraldean dauden galderei eta kezkei erantzun irmo bat emateko bildu gara. Eta hori zabal-tasunez eta aniztasunez egin nahi dugu», esan zuten.

Aurkezpen mahaian bozera-maile gisa Pedro Albite, Begoña Zabala, Joxerra Etxebarria, Itziar Lopategi eta Arantxa Hirigoi en agertu ziren. Eta Bilgunearen sustatzaileen artean ziren Arnaldo Otegi, Joseba Permach, eta Antton Morcillo Batasuneko mahaikideak; Rafa Diez LABeko koordinatzaile nagusia; Xabier Amuriza, Jon Lopategi, Unai Iturriaga, eta Imanol Lazkano bertsolariak; Fermin Muguruza, Evaristo eta Anje Duhalde kantariak; eta baita, besteak beste, Tasio Erki-zia, Amparo Lasheras, Julen Kalzada, Arantza Urkaregi eta Martin Orbe ere.

Ekimen berria zertan den zehazten duen konpromisoen agiria irakurri zuten Labrit pilotalekuan eginiko ekitaldian. Bost oinarri ditu proposamenak: autodeterminazioa eraikitzea, gatazkari irtenbide demokratikoa ematea, erasoei aurre egitea, eraldaketa eta berdintasuna borrokatzea eta euskara eta euskal kultura zabalitzea.

Oinarri horiekin bat egiten duten «abertzale, ezkertzaile eta aurrerazale guztiei» biltzeko deia egin zien bilgune berriak. «Euskal Herrian aldaketa politikoa bideratzeko indar eta borondate nahikoa dago, eta asmo hori gauzatzeko ordua iritsi da. Indar eta konpromiso horiek guztiak denon artean bildu eta egituratzeko garaia da», adierazi zuten.

«Aro berri baten erreferente politikoa»

Autodeterminaziorako Bilgunea ezker abertzalearen baitan dagoen gehiengo antolatze-ko xedearekin abiatu da. «Gaurko zatiketa eta nahasketa politikoa gaindituz, Euskal Herrian za-

(Hurrengo orrian jarraitzen du)



LANDER F. ARROIARE / ARGAZKI PRESS

Hirurehun lagunek agertu zioten babesa Autodeterminaziorako Bilguneari atzo Iruñeko Labrit pilotalekuan.

KONPROMISOEN DOKUMENTUA

Proposamenaren bost oinarriak

AuBren konpromisoen agiriak bost oinarri aipatzen ditu:

1) Autodeterminazioa eraiki. Autodeterminazioa da Euskal Herriak behar duen aldaketa politikoa ardatz, eskubide zibil eta politiko guztien berma ekarriko duena herri honetara. Euskal Herriarentzat autodeterminaziorako garaia iritsi da eta honen aitorzari begira prozesu dinamiko eta erreala sustatu nahi dugu, dinamika ezberdinak jorratuz, zeregin honetan ari diren mugimendu eta subjektu guztiekin elkarlanean. Atal honetan, Udalbiltzaren ekarpena azpimarratu nahi dugu, herri honi dagozkion eskubideen defentsan nahiz herri eraikuntza demokratikoan emandako urratsak eredugarriak direlako.

2) Gatazkari irtenbide demokratikoa eman. Estatuek herri honentzat salbuespen egoera, eskubideen urraketa eta gatazkaren behin betikotzea eskaintzen duten honetan, bakearen bandera altxatu eta beharra aldarrikatu nahi dugu. Askatasunean eta justizian oinarritutako bakea behar dugu, herri honek mendeetan zehar

pairatu duen sufrimendurekin amaitzea premiazkoa baita. Horregatik, Lizarragarazi Hitzarmenak zioena gure egiten dugu, Euskal Herriari hitza eman eta bere erabakiak errespetatuak izan behar direla diogu, denon arteko elkarriketaren aldeko bidea aldarrikatuz.

3) Erasoei aurre egin. Euskal Herriak eskubide oro ukatu eta urratuak ditu bi estatuen aldetik eta hamaika eraso pairatzen ditu hizkuntza, kultura edo arlo politikoan ere. Herri honen bihotza eta etorkizuna akabatu nahi dira, salbuespen egoera batean bizitzera kondenatu nahi gaituzte, eraso polizial, judizial nahiz politikoaren bitartez. Egoera honen aurrean, inoiz baino beharrezkoagoa gertatzen da erantzun trinkoa ematea. Autodeterminaziorako Bilguneak aurre egingo dio errealitate honi, erantzuteko bitartekoak eskainiz euskal gizarteari.

4) Eraldaketa eta berdintasuna borrokatu. Euskal Herria aske nahi dugun heinean, gizarte eredu berriaren aldekoak gara, gizarte justizian eta berdintasunean oinarritutakoa. Euskal Herrian bizi diren pertsona guztien bizi baldintzak hobetu

nahi ditugu eta hori beharrezkoa ez ezik posiblea da gure herrian sortzen den aberastasuna era egokian banatuz gero eta gure lurak dituen baliabideen ustiapen orekatua eginez gero. Justiziaren lehenengo zutabea den berdintasunaren alde lan egin nahi dugu, jatorriaren, generoaren edota ideien arabera diskriminazio oro behin betiko ezabatzeko. Herrien eta pertsonen arteko elkartasuna gure ikurra da.

5) Euskara eta euskal kultura munduari begira. Ikasleek hezkuntza sistema propioa behar dute, zero urtetik unibertsitateraino, belaunaldi berri guztiak euskaldunak izateaz gain, euskal kulturaz, prestakuntza osoaz eta gizarte balore aurrerakoiez jabe daitezzen. Gure herriak euskaraz bizitzeko duen eskubidea gaurdanik bermatu behar da, hezkuntzatik hasiz baina esparru sozial guztietara zabalduz. Euskaraz eginez eta euskal kulturaren garapenean murgilduko da, beraz, Autodeterminaziorako Bilgunea, hauxe baita kultura unibertsalari egin diezaiokogen ekarpenik aberatsena.

Agiria osorik, www.egunkaria.com/AuB helbidean